

Fas Jon

Nægkiariien sə rani mə nəfe i nəkukuə

Jon in aposol riti sə Iesu rokeikei pik. In rirai nəkukuə me i Jon, Fas Jon, Seken Jon, mine Namba Tri Jon. In rirai nəkukuə me nəha ipaka ti nuk 90. Fas Jon rəvəhag m nakalasia me mini mə irəha tuhaməkeikei mhəsiari ti nahatən eikuə me kamo nahatən eikuə me həkoui irapw irəha ia suatuk atukwatukw. Nahatən eikuə me nəha kamhəni mə Iesu ripko mhə in Kristo, Tini Kumwesən. Həni mə Kumwesən ripkuvehe mhə mo in iərmama rəmwhen ia kitaha. Jon rokeikei mə nakalasia me tuhəukurən mə Iesu in Kumwesən mine in mwi iərmama. Jon rokeikei mə truvehi utə nətərigien səvəi nakalasia me pwəh hərer əknekın ia nahatətəien səvənraha ia Iesu Kristo mamho nokeikeien. In rini mə kitaha tsaməkeikei mhokeikei kitaha me, mamhəsiai nəgkiariien me səvəi Kumwesən. Trini minuə samo iamınha irə, səukurən mə kitaha nipwnəti Kumwesən me.

Nægkiariien səvəi Nimiruien

¹ Nægkiariien i səkimaha raməvisau Nægkiariien sə rinarə raka fwe tui nəpın tıprənə ramiwən ihi. Kimaha iahəuvəregi raka Nægkiariien nəha, mhətoni ia nənimemaha, mhəspau irə, mhərapı ia rəgimaha. Nægkiariien nəha in Nimiruien.

² Nimiruien i rıməier pehe tukumaha. Kimaha

iahənətoni mhəukurən mə in nɪpərhiēnien. Nənə təkwtəkwi ni iahaməni irapw Nimiruiēn Rerɪn i tukumiaha. Fwe kupwən in rɪnamarə irau Tata Kumwesən, nənə marə mier pehe tukumaha.

³ Iahaməni irapw tukumiaha narimnari me i iahənətoni mhəregi mə kɪmiaha tihəuvehe mho pəri nari kitaha m kɪmiaha. Pərhiēn kɪmaha iahamo pəri nari kɪmaha Tata Kumwesən mɪne Tɪni, Iesu Kristo.

⁴ Nəgkiariēn me i iahamrai rauvehe tukumiaha mə tro rerimaha ragien.

Navənien ia nukuraanien

⁵ Nəgkiariēn i kɪmaha iahəregi in rɪməni pehe tukumaha, nənə iahaməni pehe tukumiaha, mə Kumwesən in nukuraanien nəpitəvien riwən anan irə.

⁶ Trɪni mɪnuə kitaha səni mə samo pəri nari kitaha min, mətə ia navənien səkitaha samavən ia nəpitəvien, nənə sameikuə. Noien səkitaha ripkesi pen mhə nəgkiariēn sə ro nɪpərhiēnien.

⁷ Mətə trɪni mɪnuə ia navənien səkitaha samavən ia nukuraanien rəmwhen in ramarə ia nukuraanien, nənə kitaha samo pəri nari, nite Tɪni, Iesu, ramaikuas raka noien ərəha me pam səkitaha, mo kitaha səmher.

⁸ Trɪni mɪnuə kitaha səni mə səpko mhə noien ərəha, sameikuə atukw a ia kitaha me, nənə nəgkiariēn sə ro nɪpərhiēnien riwən ia kitaha.

⁹ Mətə kitaha səukurən nətigiteien ia Kumwesən, noien səvənhi ratukwatukw. Ro iamɪnhi irə, trɪni mɪnuə səni irapw noien ərəha me səkitaha

min, nənə in trenouenou noien ərəha me səkitaha, maikuas raka noien me pam i səno həpkatukwatukw mhə, mo kitaha səmher.

¹⁰ Trini minuə kitaha səni mə səpko mhə noien ərəha, samo Kumwesən mə in ieikuə riti, nənə nəgkiariien səvənhi riwən ia kitaha.

2

¹ Nipwnətik me. Iakamrai nəgkiariien me i tukumiaha məminise kimiaha mə tihəpwəh noien ərəha. Mətə trini minuə iərmama riti ro noien ərəha, iərmama riti nəha ikin trasitu ia kitaha, məgkiari tukwini səkitaha m Tata Kumwesən. Iərmama nəha in nəha Iesu Kristo, in iəmə atukwatukw.

² In remhə niten raikuas raka noien ərəha me səkitaha. In ripkəmhə mhə mə niten traikuas raka əpa noien ərəha me səkitaha, mətə in remhə mwi mə niten traikuas raka noien ərəha me səvəi nərmama me ia tənəmtənə me pam.

³ Kitaha səfukurən mə səuvəuvehe mhəuvəukurən pərhien Kumwesən? Trini minuə samo nəgkiariien me səvənhi, noien nəha ramahatən pen.

⁴ Iərmama sə rani mə in rukurən Kumwesən mətə ripko mhə nəgkiariien me səvənhi, in ieikuə, nənə nəgkiariien sə ro nipərhienien riwən irə.

⁵ Mətə trini minuə iərmama riti ramo nəgkiariien səvəi Kumwesən, in pərhien iərmama i ramokeikei Kumwesən ia noien sə ratukwatukw pam. Kitaha səfukurən mə səpwit əknekin ia Kumwesən? Noien i sə takini ramahatən pen.

2:1: Hip 7:25, 9:24

2:2: Jon 1:29, 11:52, Kol 1:20, 1Jon 4:10,14

2:4: 1Jon 1:6,8

⁶ Iærmama sæ rani mæ in rəpwit æknekīn ia Kumwesən traməkeikei mavən ia navənien kuation nəha Iesu rīnavən irə.

Nəgkiariien vi

⁷ Nīpwnətīk keikei me. Nəgkiariien i iakamrai m kīmiaha rīpko mhə nəgkiariien vi riti, mətə in nəgkiariien akuas sə hiəuvəregi raka kīnani fwe nukunen. Nəgkiariien akuas i in nəgkiariien i sə hiəuvəregi raka.

⁸ Mətə ia nətoniien riti mwi, nəgkiariien i iakamrai rauvehe tukumiaha, in nəgkiariien vi. Kīnətoni ia suatuk vi riti ia nīmīruien səvəi Iesu mīne səkīmiaha tī nəri nə mə nəpītəvien rīnakurau mamevən, nukuraanien pərhien ruvəuvehe maməhiapw.

⁹ Iærmama sæ rani mæ in ramarə ia nukuraanien mətə raməmwəki piəvni, in ramarə ihi ia nəpītəvien.

¹⁰ Iærmama sæ ramokeikei piəvni in ramarə ia nukuraanien, nənə nari riti riwən ia narəien səvənhi tro in rapəti mīmwei.

¹¹ Mətə iærmama sæ raməmwəki piəvni in ramarə ia nəpītəvien, mamavən ia nəpītəvien, mīreirei kwopun ramevən ikin, tī nəri nə mə nəpītəvien rəuiui nənimen.

¹² Nəkwərhwəkərha me. Iakamrai nəgkiariien i rauvehe tukumiaha, tī nəri nə mə Kumwesən rīnenouenou raka noien ərəha me səkīmiaha tī nəri Iesu rīno.

2:7: 2Jon 5-6, 1Jon 2:24, 3:11 **2:8:** Jon 13:34, Rom 13:12, Jon 1:9

2:9: 1Jon 3:10,15, 1Jon 4:20 **2:10:** Jon 11:9, Rom 14:13 **2:11:**

Jon 11:10, 12:35 **2:12:** 1Kor 6:11

13 Tata me. Iakamrai nægkiariien i rauvehe tukumiaha,

tì nəri nə mə kímiaha hiəuvəukurən raka Iərmama sə rinarə raka fwe tui nəp̄in tìprənə ramiwən ihi.

Ntəmaruə me. Iakamrai nægkiariien i rauvehe tukumiaha,

tì nəri nə mə kímiaha hiəuvəuvehi irapw raka niskaiien səvəi iəremhə ərəha Setan.

14 Nəkwərhakwərha me. Iakamrai nægkiariien i rauvehe tukumiaha,

tì nəri nə mə kímiaha hiəuvəukurən raka Tata Kumwesən.

Tata me. Iakamrai nægkiariien i rauvehe tukumiaha,

tì nəri nə mə kímiaha hiəuvəukurən raka Iərmama sə rinarə raka fwe tui nəp̄in tìprənə ramiwən ihi.

Ntəmaruə me. Iakamrai nægkiariien i rauvehe tukumiaha,

tì nəri nə mə kímiaha hiəskai,
nægkiariien səvəi Kumwesən ramarə ia rerimiaha,
nənə hiəuvəuvehi irapw raka niskaiien səvəi iəremhə ərəha Setan.

Tìprənə i mine noien me kamo ia tìprənə i

15 Tihəpwəh nokeikeiien noien me səvəi tìprənə i uə narimnari me səvəi tìprənə i. Trini minuə iərmama riti rokeikei noien me səvəi tìprənə i, in ripkokeikei pərhiēn mhə Tata Kumwesən.

16 Iakani iam̄inhi irə tì nəri nə mə nəp̄in me pam nərmama me səvəi tìprənə i kamho nəfe

noien ərəha nɪpwrənraha rokeikei. Nəpɪn me pam rerɪnraha ramevən ia nəfe nənimənraha rətoni hokeikei mə tuhəuvehi. Irəha kamhərpwi irəha ti nautə me səvənraha. Noien me pam nəha həpkuku pen mhə ti Tata Kumwesən, mətə kamhəuku pen ti tɪprənə i.

¹⁷ Noien me səvəi tɪprənə i mɪne narimnari me nərmama səvəi tɪprənə i hokeikei hənaməuvehe tuhəiwən, mətə iərmama sə ramo nəkwai Tata Kumwesən ramarə rerɪn.

Profet eikuə me

¹⁸ Nɪpwnətɪk me. Nəpɪn sampam i samarə irə. Kɪmɪaha hiəuvəregi raka mə iərmama riti truvehe məmwəki pɪk Kristo. Təkwtəkwni mɪne nəha nərmama həpɪk səməme kamhəmwəki pɪk Kristo həuvəuvehe raka. Noien i ro nukurənien i tuku-taha səukurən mə pərhien nəpɪn sampam i samarə irə.

¹⁹ Nərmama me nəha hənəpwəh kɪtaha mhəier, ti nəri nə mə rɪpko mhə irəha nərmama me pərhien səkɪtaha. Trɪni mɪnuə irəha nərmama pərhien me səkɪtaha ko kamhəripɪn, mamharə kɪtaha mɪnraha. Mətə irəha hənəpwəh kɪtaha mhəier, mho nukurənien i mə rɪpko mhə irəha nərmama me pərhien səkɪtaha.

²⁰ Mətə kɪmɪaha hiəuvəuvehi raka Nənimwɪn i Kristo Ikinan rɪnətəgi pen ia kɪmɪaha, ro pen kɪmɪaha pam hiəuvəukurən nari.

²¹ Rɪpko mhə iakamrai nəgkiariien i rauvehe tukumɪaha ti nəri nə mə kɪmɪaha hiəreirei nəgkiariien sə ro nɪpərhienien, rekəm. Mətə

2:17: Mat 7:21, 1Kor 7:31

2:18: 1Tes 4:7, Mat 24:5,24, 2Jon 7

2:19: Wok Me 20:30, 1Kor 11:19

2:20: 1Kor 2:15, 1Jon 2:27

iakamrai nægkiariien i rauvehe tukumiaha ti nəri nə mə hiəuvəukurən raka nægkiariien sə ro nıpərhiendien, nənə hiəukurən mwi mə neikuəien riti ko rıpkuku pen mhə irə.

²² Sin in ieikuə? Iərmama sə rani mə rıpkə mhə Iesu in Kristo in ieikuə. Iərmama iamınha irə in raməmwəki pık Kristo, mani neikuəien ia Tata Kumwesən mine Tini.

²³ Iərmama sə rani neikuəien ia Tini Kumwesən, Tata Kumwesən rıpkarə mhə tukwe. Mətə iərmama sə rani irapw Tini Kumwesən, Tata Kumwesən in mwi ramarə tukwe.

²⁴ Nægkiariien nəha kimiaha hiəməregi kinani fwe nukunen tihətui amasan tukwe pwəh rəpwit əknekın ia rerimiaha ia nəpın me. Trini minuə nægkiariien nəha hiəməregi kinani fwe nukunen rəpwit əknekın ia rerimiaha nəpın me, kimiaha mwi tihəpwit əknekın ia Tini Kumwesən mine Tata səvənhi.

²⁵ Nənə in i nəri Kumwesən rıməni mə traməkeikei muvei pehe m kitaha: nımıruien rerin.

²⁶ Iakamrai nægkiariien i rauvehe tukumiaha, maməgkiari ia nərmama me nəha səməme kamhəmwur mə tuheikuə ia kimiaha.

²⁷ Kimiaha hiəuvəuvehi raka Nənimwın sə Kristo rınətəgi pen ia kimiaha. Nənimwın nəha rinarə raka ia kimiaha ro pen hiəpkətui mhə mwi iərmama riti mə trahatən kimiaha. Mətə nənimwın sə Kristo rınətəgi pen ia kimiaha ramahatən kimiaha ia narimnari me pam. Nənə narimnari me nəha ramahatən kimiaha irə ro nıpərhiendien

ripko mhə neikuəien. Ro iam̄nhi irə tihəpwit əknek̄in ia Kristo rəmwhen ia Nənimw̄in nəha rinahatən kimiaha irə.

Nipwnəti Kumwesən me

²⁸ Ouəh nipwnətik me. Tihəpwit əknek̄in ia Kristo mə nəp̄in in trier pehe irə kitaha tsəpwəh nehek̄irien, ia nuveheien səvənhi kitaha tsəpwəh naurisien ia nənimen.

²⁹ Kimiaha hiəuvəukurən raka mə noien səvəi Kumwesən ratukwatukw. Ro iam̄nhi irə hiəuvəukurən mw̄i mə nərmama səməme kamho noien atukwatukw irəha nipwnətin me.

3

Kumwesən rokeikei pik kitaha

¹ Hətoni ro Kumwesən rokeikei pik kitaha! Nokeikeien səvənhi rasori pik tukutaha ro pen in raməkwein kitaha mə nipwnətin me. Pərhien kitaha nipwnətin me. Nərmama səvəi t̄iprənə i həreirei kitaha ti nəri nə mə həreirei Kumwesən.

² Nipwnətik keikei me. Təkwtək̄wuni nəha kitaha səuvəuwehe raka mhəno nipwnəti Kumwesən me ia kitaha, mətə rəpwəh ih̄i noien nukurənien i mə tsəuwehe mhəfo irə. Mətə nari kuatia kitaha səukurən. Nəp̄in Kristo trier pehe irə, kitaha tsəuwehe mhəmwhen irə, ti nəri nə mə nəp̄in nəha kitaha tsətoni in ia nənimetaha.

³ Nərmama me p̄am səməme kamhəmri pen əknek̄in nətərigien səvənraha ia Kristo mə tuhəuwehe mhəmwhen irə kamho noien səvənraha rəmher rəmwhen ia noien səvənhi rəmher.

⁴ Iərmama sə ramo noien ərəha in ramərui Loa səvəi Kumwesən. Iakani iamīnhi tī nəri nə mə nəgkiariien i “noien ərəha” nīpwran i nəruien Loa səvəi Kumwesən.

⁵ Nənə kīmiaha hiəukurən mə Kristo rīməier pehe mə truvehi raka noien ərəha me. Hiəukurən mə noien ərəha riwən irə.

⁶ Ro iamīnhi irə iərmama sə rəpwit əknekīn ia Kristo ko rīpkəmwur pen mhə ia noien ərəha. Iərmama sə raməmwur pen ia noien ərəha rīpkətə raka mhə Kristo mīpkukurən raka mhə mwi in.

⁷ Nīpwnətīk me. Tihəpwəh nəseniien iərmama riti reikuə ia kīmiaha. Iərmama sə ramo noien atukwatukw, in iəmə atukwatukw rəmwhen ia Kristo in iəmə atukwatukw.

⁸ Iərmama sə raməmwur pen ia noien ərəha, in tīni Setan, tī nəri nə mə fwe ia nukune narəien mauvehe Setan ramo noien ərəha. Nəri i in i Tīni Kumwesən rīməier pehe tukwe mə trouraha noien me Setan ramo.

⁹ Iərmama sə in tīni Kumwesən ko rīpkəmwur pen mhə ia noien ərəha tī nəri nə mə nīmīruien səvəi Kumwesən ruvəuvehe mīno raka kuatia irau nīmīruien səvənhi. In tīpīkəmwur pen mhə ia noien ərəha tī nəri nə Kumwesən in Tata səvənhi.

¹⁰ Kitaha səfukurən mə nisimə nəha nīpwnətī Setan, nisimə nəha nīpwnətī Kumwesən? Noien i ramahatən pen. Iərmama sə rīpko mhə noien atukwatukw, məpwəh nokeikeiien piəvni rīpko mhə in tīni Kumwesən. In tīni Setan.

Sokeikei kitaha me

3:5: 2Kor 5:21, 1Pit 2:22-24, 1Jon 2:2 **3:6:** Rom 6:1-2,14, 1Jon 3:9

3:7: 1Jon 2:29 **3:8:** Jon 8:44 **3:9:** 1Jon 5:18

11 Nægkiariien i in i kímiaha hiäuværegi raka kïnani fwe nukunen mæ kitaha tsamækeikei mhokeikei kitaha me.

12 Kitaha tsæpwæh næmwhenien ia Ken. In iærmama sævæi Setan. In rousi æpune piävni anan. Ken rousi æpune piävni ti næfe? In rousi æpune ti næri næ mæ noien sæ piävni ramo ramasan, mætæ noien sæ in ramo ræðaha.

13 Piak me, nænimemiaha træpwæh nierien næpïn tihætoni nærmama sævæi tiþrænæ i kamhæmwæki kímiaha.

14 Kitaha sæukuræn mæ sæuvæier raka ia nemhæien mhæuvehe ia nímïruien. Sæukuræn næri i ti næri næ mæ samokeikei piævtaha me. Iærmama sæ nokeikeiien riwæn iræ in ramaræ ihi ia nemhæien.

15 Iærmama sæ ramæmwæki piävni in ræmwhen ia iærmama sæ ramousi æpune iærmama. Nænæ kímiaha hiæukuræn mæ iærmama sæ ramousi æpune iærmama nímïruien rerïn riwæn iræ.

16 Kitaha sæfukuræn næri nokeikeiien? Iesu Kristo rinahatæn kitaha iræ næpïn rinæseni pehe nímïruien sævænhi tukutaha. Nænæ ratukwatukw mwi mæ kitaha tsæseni pen nímïruien sækitaha ti piævtaha me.

17 Trïni mïnuæ iærmama riti sævænhi narimnari me sævæi tiþrænæ i rasori rætæ piävni riti nari riwæn tukwe, mætæ in ramo næri auær a iræ, nokeikeiien sævæi Kumwesæn træfo maræ iræ?

18 Nïpwnætik me. Ræðaha mæ samokeikei nærmama ia tærhutaha a. Kitaha tsamækeikei mhokeikei pærhien iræha, mho narimnari me

3:11: Jon 13:34 **3:12:** Jen 4:8 **3:13:** Mat 5:11-12, Jon 5:18-19

3:14: Jon 5:24, 1Jon 2:11, Mat 5:21-22 **3:15:** Rev 21:8 **3:16:**

Jon 13:1, Kal 1:4, 1Tes 2:8 **3:17:** Dut 15:7 **3:18:** Jem 2:15-16

trasitu ia nirəha.

¹⁹ Trini minuə samo iaminha irə, kitaha səukurən mə kitaha nərmama səvəi nīpərhienien. Nənə səukurən nuveheien ia nəmri Kumwesən reritaha fwe imwə rəpwəh nehekiriien.

²⁰ Nəri auər a mə səregi ia reritaha mə səno noien riti rərəha, mətə tsəpwəh nehekiriien ti nəri nə mə Kumwesən in rasori məpi raka reritaha, nənə mukurən pam narimnari.

²¹ Nīpwnətik keikei me. Trini minuə kitaha səregi ia reritaha mə səpko mhə noien riti rərəha, tsəpwəh nehekiriien ia nəmri Kumwesən.

²² Nənə nəfe nəghin kitaha tsəres, in truvehi pehe m kitaha, ti nəri nə mə samo nəgkiariien me səvənhi mine nəfe rerin ramagien tukwe.

²³ Nənə in i nəgkiariien səvənhi sə in riməni mə tso. Kitaha tsaməkeikei mhəni nīpərhienien ia nəghi Tini, Iesu Kristo, nənə mamhokeikei kitaha me rəmwhen in ruvəni raka tukutaha i.

²⁴ Iərmama sə ramo nəgkiariien me səvənhi rəpwit əknekın ia Kumwesən, nənə Kumwesən rəpwit əknekın irə. Kitaha səfukurən mə Kumwesən rəpwit əknekın ia kitaha? Nənimwin sə in riməuvei pehe m kitaha ramo kitaha səukurən.

4

Nətə sasien ia nənimwin me

¹ Nīpwnətik keikei me. Tihəpwəh ninien nīpərhienien ia profet me pam, mətə tihəkupwən mhətə sas raka ia nirəha mə nənimwin sə ramarə ia nirəha ruku pen pərhien ti Kumwesən uə rekəm.

Iakani iam̄inhi irə ti nəri nə mə profet eikuə me həpik həuvavən pam ia tənəmtənə me.

² Noien nəha sə tro k̄imiaha hiəregi sas mə nən̄imw̄in səv̄ai Kumwesən ramarə ia iərmama ro iam̄inhi irə. Trini minuə iərmama rani mə nəp̄in Iesu Kristo r̄iməuvehe ia tiprənə i nipwran rəmwhen ia nipwrai iərmama, iərmama nəha Nən̄imw̄in sə raku pen ti Kumwesən ramarə irə.

³ Mətə nərmama me pam səməme həpwəh nini irapwien Iesu Nən̄imw̄in səv̄ai Kumwesən r̄ipkarə mhə ia nirəha. Nən̄imw̄in sə ramarə ia nirəha nən̄imw̄in səv̄ai iərmama sə raməm̄wəki pik Kristo. K̄imiaha hiəvəregi raka mə iərmama nəha tru-vehe, mətə təkwtəkwuni nəha nən̄imw̄in səvənhi ruvəuvehe raka ia tiprənə i.

⁴ Nipwnətik me. K̄imiaha nə nərmama me səv̄ai Kumwesən. Hiəuvəuvehi irapw raka niskaiien səv̄ai profet eikuə me nəha ti nəri nə mə Nən̄imw̄in sə ramarə ia k̄imiaha niskaiien səvənhi rasori m̄api raka nən̄imw̄in sə ramarə ia tiprənə i.

⁵ Irəha nərmama səv̄ai tiprənə, ro pen nəgkiariien səvənraha səv̄ai tiprənə, nənə nərmama səv̄ai tiprənə kamhətərig ia nirəha.

⁶ Mətə k̄itaha nərmama me səv̄ai Kumwesən. Ro iam̄inhi irə iərmama sə rukurən Kumwesən ramətərig ia k̄itaha, mətə iərmama r̄ipko mhə in iərmama səv̄ai Kumwesən in rəpwəh nətərigien ia k̄itaha. Noien i ro k̄itaha sətə sas Nən̄imw̄in sə rani nipərhiienien mine nən̄imw̄in sə rameikuə.

Kumwesən r̄iməkupwən mokeikei k̄itaha

4:2: 1Kor 12:3 **4:3:** 1Jon 2:18, 2Jon 7 **4:4:** Mat 12:29, 1Jon 5:4-5 **4:5:** Jon 15:19 **4:6:** Jon 8:47

7 Nipwnatik keikei me. Pwäh kitaha sokeikei kitaha me ti nəri nə mə nokeikeiien raku pen ti Kumwesən. Iərmama sə ramo nokeikeiien in tini Kumwesən in rukurən Kumwesən.

8 Iərmama sə nokeikeiien səvənhi riwən in rireirei Kumwesən ti nəri nə mə Kumwesən in nukune nokeikeiien.

9 Kumwesən rinəfo mo kitaha sətoni nokeikeiien səvənhi? In rinərhi pehe Tini anan kuatia ruvehe ia tıprənə i mo suatuk m kitaha səuvehi nimiruien irə.

10 Nəri i in nokeikeiien pərhiən. Ripko mhə kitaha sənokeikei Kumwesən, mətə Kumwesən rinokeikei kitaha, mərhi pehe Tini remhə niten raikuas raka noien ərəha me səkitaha.

11 Nipwnatik keikei me. Kumwesən rokeikei pik kitaha ro iamınhi irə kitaha mwi tsaməkeikei mhokeikei kitaha me.

12 Iərmama riti ripkətoni raka mhə Kumwesən. Mətə mə kitaha samokeikei kitaha me, Kumwesən rəpwit əknekın ia kitaha, nənə nokeikeiien səvənhi ruvehe matukwatukw pam ia kitaha.

13 Kitaha səfukurən mə səpwit əknekın ia Kumwesən in rəpwit əknekın ia kitaha? Kitaha səukurən ti nəri nə mə in riməuvei pehe Nənimwın səvənhi m kitaha.

14 Nənə kimaha iahənətoni raka mamhəni irapw mə nipərhiənien Tata Kumwesən rinərhi pehe Tini ruvehe mə truvehimiru nərmama ia tıprənə.

15 Iərmama sə rani irapw mə Iesu in Tini Kumwesən, Kumwesən rəpwit əknekın irə, nənə in

4:7: 1Jon 2:29 4:8: 1Jon 4:16 4:9: Jon 3:16 4:10: Rom 5:8-10, 1Jon 2:2 4:11: Mat 18:33 4:12: Jon 1:18, 1Jon 2:5-6
4:13: 2Kor 1:22, 1Jon 3:24 4:14: Jon 3:17 4:15: 1Jon 5:5

mwi rəpwit əknekɪn ia Kumwesən.

¹⁶ Kitaha səuvəukurən raka nokeikeiien i Kumwesən ramo m kitaha, səuvəuvehe raka mhəni nɪpərhiēnien irə. Kumwesən in nukune nokeikeiien. Ro iamɪnhi irə iərmama sə ramarə ia nokeikeiien in rəpwit əknekɪn ia Kumwesən, Kumwesən rəpwit əknekɪn irə.

¹⁷ Nəpɪn nokeikeiien ruvehe matukwatukw pam ia kitaha, noien i tro kitaha səpwəh nehekɪrien ia nəpɪn Kumwesən trərpwɪn noien ərəha me irə səvəi nərmama. Kitaha tsəpwəh nehekɪrien nəpɪn nəha, ti nəri nə mə ia tɪprənə i noien səkitaha rəmwhen ia noien səvəi Kristo.

¹⁸ Iərmama sə ramokeikei Kumwesən ko rɪpkhekɪr mhə in. Nəpɪn kitaha səukurən amasan mə Kumwesən ramokeikei kitaha, kitaha tsəpwəh nehekɪrien. Iərmama ramhekɪr ti nəri nə mə rerɪn ramrhi nərpwɪnien nəha Kumwesən tro, mətə iərmama sə ramhekɪr iamɪnhi irə rɪpkukurən amasan mhə ihi mə Kumwesən ramokeikei in.

¹⁹ Kitaha samokeikei kitaha me ti nəri nə mə Kumwesən rɪməkupwən mokeikei kitaha.

²⁰ Trɪni mɪnuə iərmama riti rɪni mə ramokeikei Kumwesən, mətə raməmwəki ihi piəvni, in ieiikuə riti. Iərmama sə rəpwəh nokeikeiien piəvni sə ramətoni ia nənimen in ko rɪpkokeikei mhə Kumwesən sə rɪpkətoni mhə.

²¹ Nənə nəgkiariien i in i Iesu rɪməuvei pehe m kitaha. Iərmama sə ramokeikei Kumwesən traməkeikei mokeikei mwi piəvni.

5

Iərmama sə rani nīpərhienien ia Iesu Kristo

¹ Nərmama me pam səməme kamhəni nīpərhienien ia Iesu mə in Kristo sə Kumwesən rīməni mə trərhi pehe i, irəha nīpwnəti Kumwesən me. Nənə kimiāha hiəukurən mə iərmama sə ramokeikei tata riti in ramokeikei mwi nīpwnətīn me.

² Kitaha tsəfukurən mə samokeikei pərhien nīpwnəti Kumwesən me? Trīni mīnuə samokeikei Kumwesən, nənə mamho nəgkiariien me səvənhi, noien nəha ramahatən pen mə kitaha samokeikei pərhien irəha.

³ Trīni mīnuə samokeikei Kumwesən nīpwrān i tsamo nəgkiariien me səvənhi. Nənə nəgkiariien me səvənhi həkkipam mhə tukutaha,

⁴ ti nəri nə mə kitaha pam nīpwnəti Kumwesən me saməuvehi irapw nīskaiien səvəi noien ərəha me kamo ia tīprənə i. Nəri sə saməskai irə rauvehi irapw nīskaiien səvəi noien ərəha me kamo ia tīprənə i in i nahatətəien səkitaha.

⁵ Sin ko ruvehi irapw nīskaiien səvəi noien ərəha me kamo ia tīprənə i? Iərmama sə rani nīpərhienien mə Iesu in Tīni Kumwesən, iərmama nəha in əpa ko ruvehi irapw nīskaiien səvəi noien ərəha me kamo ia tīprənə i.

⁶ Iesu Kristo in iərmama sə rīməuvehe ko paptaes irə ia nui marə memhə mwi nīten raiu. Rīpko mhə in iərmama sə rīməuvehe ko paptaes əpa irə ia nui, rekəm. Mətə in iərmama sə rīməuvehe ko paptaes irə ia nui marə memhə mwi nīten raiu. Nənīmwi in Ikinan rani irapw mə nəri nəha

ro nīpārhiēnien, tī nəri nə mə Nənimwīn Ikinan in nukune nīpārhiēnien.

⁷ Nəri kahar hamarni irapw nəri nəha mə ro nīpārhiēnien,

⁸ Nənimwīn Ikinan mīne nui mīne netə. Nənə nəgkiariien səvənrahar kwatia.

⁹ Nəpīn me kitaha saməni nīpārhiēnien ia nəgkiariien səvəi iərmama, mətə nəgkiariien səvəi Kumwesən ro nəgsen məpi raka, tī nəri nə mə nəgkiariien nə nəgkiariien səvəi Kumwesən. Nənə in ruvəuvei pehe raka nəgkiariien səvənhi raməgkiari ia Tīni.

¹⁰ Iərmama sə rani nīpārhiēnien ia Tīni Kumwesən rauvehi nəgkiariien nəha ia rerin. Mətə iərmama sə rīpkīni mhə nīpārhiēnien ia Kumwesən, in rani Kumwesən mə ieikuə riti, tī nəri nə mə in rīpkīni mhə nīpārhiēnien ia nəgkiariien sə Kumwesən ruvəuvei pehe raka raməgkiari ia Tīni.

¹¹ Nəfe nəha nəgkiariien? Nəgkiariien i in i. Kumwesən rīməuvei pehe nīmīruien rerin m kitaha, nənə nīmīruien nəha saməuvehi ruku pen tī Tīni.

¹² Iərmama sə rauvehi Tīni Kumwesən rauvehi mwi nīmīruien, mətə iərmama sə rīpkuvehi mhə Tīni Kumwesən rīpkuvehi mhə nīmīruien.

Nīmīruien rerin

¹³ Iakamrai nəgkiariien me i rauvehe tuku-miaha. Kīmīaha nərmama səməme hiaməni nīpārhiēnien ia nəghi Tīni Kumwesən. Iakoikei

mə kɪmiaha tihəukurən mə hiəuvəuvehi raka nimiruien rerin.

¹⁴ Nənə təkwtəkwuni, trini minuə kitaha səfwaki m Kumwesən, nari riti nəha ikin ramasitu ia kitaha mə tsəpwəh nehekiriien. Nəri nəha in i Kumwesən ruvəni raka mə triregi nəfwakiien səkitaha, mətə nəfwakiien səkitaha traməkeikei mhesi pen atukwatukw nətərigien səvənhi mine nəfe in rokeikei mə tro.

¹⁵ Trini minuə səukurən mə in triregi nəfwakiien səkitaha, nəfe nəghin tsəres in i, nənə səuvəukurən raka mə tsəuvehi.

¹⁶ Trini minuə kɪmiaha riti rətoni piəvni riti ramo noien ərəha mətə ripko mhə noien ərəha sə ramiri pen in mə tremhə, kɪmiaha tihəfwaki tukwe pwəh Kumwesən ruvei pen nimiruien min. Mətə noien ərəha riti nəha ikin sə ramiri pen iərmama mə tremhə. Nənə iou iapkini mhə mə tihəfwaki ti nərmama səməme kamho noien ərəha nəha.

¹⁷ Nərmama me pam səməme kamho noien sə ripkatukwatukw mhə kamho noien ərəha, mətə noien ərəha me nepwin nəha ikin səməme həpkiri pen mhə irəha mə tuhemhə.

¹⁸ Kitaha səukurən mə iərmama sə in tini Kumwesən, Tini Kumwesən atukwatukw rauvehi amasan in. Ro iamihhi irə iərmama nəha ko ripkəmwur pen mhə ia noien ərəha, iəremhə ərəha Setan rireirei nɪrapiien in.

¹⁹ Kitaha səukurən mə kitaha nɪpwnəti Kumwesən me, mətə nərmama səvəi tɪprənə irəha pam kamharə ia rəgi iəremhə ərəha Setan.

5:14: Jon 14:13, 16:23, 1Jon 3:21-22
1Jon 3:9, Jon 17:5

5:16: Mat 12:31

5:18:

5:19: 1Jon 4:6

²⁰ Kitaha sæukuræn mwi mæ Tini Kumwesæn rimæuvehe, muvei pehe nukurænien m kitaha mæ tsæukuræn Kumwesæn i Kumwesæn pærhien. Nænæ kitaha sæuvæuvehe raka mhæpwit æknekîn ia Kumwesæn næha. Iakani iamînhi iræ ti næri næ mæ sæpwit æknekîn ia Tini, Iesu Kristo. In næ Kumwesæn pærhien. In næ nimiruien rerîn.

²¹ Nipwnætik me. Tihætui amasan tukumiaha me mhæpwæh næfwakien m nænimwi nari me.

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 18 Apr 2025 from source files dated 31 Aug 2023

26b0f540-c192-5878-be67-18ede9ab1416